

光緒山西通志

名宦錄十二 錄一之十二 山西通志第一百十二

賜進士出身頭品頂戴兵部侍郎兼都察院右副都御史巡撫山西提督軍務臣張煦奉

旨監修

庶官 漢至元

閔孺爲河東太守田延年督郵孺部分北尹翁歸部分南所  
舉應法得其罪辜屬縣長吏雖中傷莫有怨者

黃霸字次公淮陽夏人少學律令喜爲吏領郡錢穀計簿  
書正以廉稱察補河東均輸長復察廉爲河南太守丞擢潁  
川太守治爲天下第一五鳳三年爲丞相逢建成侯霸材長  
於治民及爲丞相功名損於治郡時然自漢興言治民吏以  
霸爲首甘露三年卒謚曰定侯

趙無忌字世卿京兆長陵人峻次兄也部河東從事爲宦官

黨京兆尹唐竑所殺

楊穆爲雲中太守成嚴功曹建光元年秋其至鞬寇居庸嚴擊之兵敗穆以身捍嚴與俱戰歿

耿勳字伯瑋扶風茂陵人由典軍上計廷陳惠康安遏之謨上納之拜郎熹平初爲上黨府丞掌令考績有成二年遷武都太守有美政部民刊石頌之稱其勤卹民隱拯阨扶傾云云

高誘涿郡人建安中辟司空掾歷官東郡濮陽遷河東監誘受學於同郡盧植注戰國策呂氏春秋淮南子行世

右漢六人

王濬字士治宏農湖人博涉墳典疏通亮遠恢廓有大志辟河東從事守令有不廉潔者皆望風自引而去刺史徐邈以

女妻之後參鎮南軍事以平吳功封襄陽侯邑萬戶卒謚武

右魏一人

如綬并州治中隨劉琨入段氏琨被留與琨子遵左長史楊橋閉門自守琨將龍季猛迫於乏食殺橋綬降

右晉一人

裴安祖河東聞喜人弱冠州辟主簿民有兄弟爭財詣州相訟安祖召其兄弟以禮義責讓之兄弟明日相率謝罪內外欽服之後高祖幸長安安祖朝於蒲坂高祖與語甚悅拜安邑令以老病固辭詔給一時俸以供湯藥焉年八十三卒

盧勇范陽人高祖時署丞相主簿屬山西霜儉運山東鄉租輸之皆令實載違者治罪令勇典其事琅邪公主虛儼千餘車勇繩劾之公主訴於高祖而勇守法不屈高祖謂郭秀曰

山西通志卷一百一十二 李晉金十二 二  
盧勇凜凜有不可犯之色真公直人也方當委之大事豈直  
納租而已勇仕至儀同三司揚州刺史卒謚武貞侯

宋世景河南尹麟第三弟西河人徙廣平少自修立精經義  
族兄弁甚重之對策上第左僕射源懷引爲行臺郎巡察州  
鎮十有餘所黜陟賞罰莫不咸允遷徙七鎮別置諸戍明設  
亭堠以備北部懷大相委重遷薦於世宗曰宋世景文武才  
略當今寡儔清平忠直亦少其比陛下若任之以機要終不  
減李冲也後母喪毀卒撰晉書未就

辛祥字萬福隴西狄道人紹光之孫也舉司州秀才太傅元  
丕爲并州刺史祥爲府屬敕行建興郡轉并州平北府司馬  
會刺史喪朝廷以其公清遂越長史敕行州事祥初在司馬  
有白壁還兵藥道顯被誣爲賊官屬推處咸以爲然祥曰道

顯面有悲色察獄以色其此之謂乎苦執申之月餘別獲眞賊後除郢華二州長史卒

右後魏四人

辛慶之隴西狄道人少以文學徵對策第一大統中周太祖東伐爲行臺左丞時初復河東以本官兼鹽池都將四年東魏攻正平郡陷之遂欲經略鹽池慶之守禦有備乃引軍退河橋之役大軍不利河北守令乘城走慶之獨因鹽池抗拒強敵時論稱其仁勇六年行河東郡事九年復行河東郡事慶之本性儉素志量淹和有儒者風度拜祕書監卒

右西魏一人

蘇瓊字珍之武強人文襄以儀同開府引爲刑獄參軍每加勉勞并州嘗有彊盜長流參軍推其事所疑賊並已拷伏失

物家並識認唯不獲盜賊文襄付瓊更令窮審乃別推得元景融等十餘人並獲賊驗文襄大笑語前妄引賊者曰爾輩若不遇我好參軍幾致枉死累遷南清河太守循聲尤著仕至大理卿卒於周

右北齊一人

張虔威字元敬清河東武城人開皇初晉王廣出鎮并州盛選僚佐以爲刑獄參軍累遷爲屬與河內張衡甚見禮重晉邸稱爲二張大業中累加開府歷江都贊治卒

崔曠字祖濬博陵安平人性至孝博學善屬文開皇中射策高第累授晉王記室參軍起居舍人大業四年從駕幸汾陽宮登太行山詔問曠曰何處有羊腸坂對曰臣按漢書地理志上黨壺關縣有羊腸坂上曰不是又答曰臣按皇甫士安

撰地書云太原北九十里有羊腸坂上曰是也因謂牛宏曰  
崔祖濬可謂問一知二終鷹揚長史

令狐熙字長熙燉煌人開皇中爲河北道行臺度支尙書百  
姓立碑頌德行臺改并州總管府卽授并州司馬厲精剖斷  
恩惠兼施終桂州刺史

李徹字廣達朔方嚴祿人性謹厚有才具初仕周宇文護子  
中山公訓爲蒲州刺史令徹以本官從焉建德五年從武帝  
伐齊拔晉州與齊王憲屯鷄栖原齊主以大軍至戰於晉州  
城北憲師敗徹與楊素宇文慶等力戰軍賴以全復從帝破  
齊師於汾北乘勝下高壁封蔡陽縣公隋初轉雲州  
刺史晉王廣鎮并州妙選正人有文武幹者爲之寮佐詔徹  
總晉王府軍事時蜀王秀亦鎮益州上謂侍臣曰安得文同



王子相武如李廣達者乎其見重如此以軍功累封安郡公  
進位柱國開皇十年徙封城陽郡公卒

陶模京兆人性明敏有器幹仁壽初爲嵐州司馬漢王諒舉  
兵刺史喬鍾葵發兵將赴諒模拒之曰漢王所圖不軌公荷  
國厚恩致位方伯謂當竭誠效命以答慈造豈有廢園未淹  
翻爲厲階鍾葵臨之以兵模辭氣不撓鍾葵義而釋之軍吏  
請斬模以壓眾心遂囚於獄諒平拜開府後從平楊元感以  
功進位銀青光祿大夫

裴仁基河東人開皇中以拜儀同領漢王諒府親信諒將反  
仁基苦諫諒怒囚之諒敗累授光祿大夫後以謀劫王世充  
復立越王侗遇害

豆盧毓字道生昌黎徒河人楚國公勣子少英果有氣節漢

王諒出鎮并州毓以妃兄爲王府主簿以從征突厥功授儀  
同三司及諒謀發兵毓苦諫不從因謂弟懿曰吾匹馬歸朝  
自得免禍此乃身計非爲國也今且僞從以思後計後諒出  
城將往介州令毓與總管屬朱濤留守毓謂濤曰漢王構逆  
敗不旋踵吾豈坐受滅亡有負國家耶當與卿出兵拒之濤  
不從因拂衣而去毓追斬之時諒司馬皇甫誕以諫諒被囚  
毓出誕與之協計及開府盤石侯宿勤武開府宇文承昌儀  
同成端長孫愷車騎安武侯元世雅原武令皇甫文灝等閉  
門拒諒部分未定諒覺迴兵襲擊之毓遂見害諒平詔贈大  
將軍封正義縣公謚曰愍

皇甫誕字元慮安定烏氏人剛毅有器局隋初累拜尙書左  
丞有能名漢王諒爲并州總管以公方選拜并州總管府司

馬總府政事一以諂之諒甚敬焉煬帝初徵諒諒用諮議王  
頰謀發兵誕數諫不納因流涕曰竊料大王兵資無敵京師  
者加以君臣定位逆順勢殊士馬雖精難以取勝願王奉詔  
入朝守臣子之節必有喬松之壽累代之榮如更遷延陷身  
叛逆一挂刑書求爲布衣黔首不可得也願察區區之心思  
萬全之計敢以死請諒怒囚之及楊素兵將至諒屯清源拒  
之主簿豆盧毓出誕於獄同謀閉城拒諒諒擊破之並抗節  
遇害詔贈柱國封宏義郡公謚曰明

長孫行布河南洛陽人右驍衛將軍晟子仁壽中爲漢王諒  
庫直甚見親狎及諒起兵南拒官軍留行布城守遂與豆盧  
毓等閉門拒諒城陷遇害

張祥京兆人并州司馬時漢王諒反遣將劉建功縱火燒其

郭祥於城西王母廟再拜泣禱曰百姓何罪致此焚燒神其有靈可降雨相救言訖雨降火遂滅士卒感其至誠莫不用命賊退以功授開府

張季珣京兆人開皇中累遷并州司馬仁壽末漢王諒舉兵季珣守井陘以功歷都水監

郇茂字蔚之恒山新市人敏慧有文學隋高祖初命掌書記及大業中累拜尙書左丞時工部尙書宇文愷右翊衛大將軍于仲文競河東銀窠茂劾奏愷仲文竟坐得罪後爲晉陽宮留守恒山贊治王文同搆之除名追遣卒

王威太原郡丞大業十三年義兵將起威與武牙郎將高君雅相與疑懼請高祖禱雨晉祠將爲不利晉陽鄉長劉世龍知之以告高祖高祖執威君雅殺之

以上太原府

高義明渤海人仁壽末蒲州長史漢王諒舉兵河東豪傑以城應諒刺史邱和遁歸關中義明謂司馬榮毗曰河東要害國之東門若失之則爲難不細城中恟恟非悉反也但收桀黠者十餘人斬之自當立定耳毗然之義明馳馬追和將與協計至城西門爲反者所殺

榮毗字子謀北平無終人仁壽中累拜蒲州司馬漢王諒舉兵長史高義明爲反者所殺毗被執諒平拜拾書侍御史卒贈鴻臚少卿

賀德仁越州山陰人以摩行稱大業末河東司法唐初累授洗馬貞觀初轉趙王友卒

陸逢爲蒲關吏文中子出自蒲關逢止之曰未可以遇我生民也文中子爲之宿翼日而行逢送之曰行矣江湖鱸鯨非

溝瀆所容也

以上菴州府

源崇西平樂都人朔方郡公雄子襲封官儀同大業中上黨贊治入爲尙書虞部郎將兵討北海賊力戰死贈正議大夫

對安

府

李德侶趙郡柏人大業末爲離石郡司法書佐太守楊子崇特禮之及子崇遇害棄尸城下德侶赴哭盡哀收瘞之至介休詣太原帥請葬于崇唐公嘉之因贈子崇官令德侶爲使者往離石禮葬焉

房元齡字喬齊州臨淄人年十八登進士大業末補隰城尉坐漢王諒徙義旗入關杖策謁太宗於軍門署記室參軍貞觀中累拜司空知門下省事封梁國公卒贈并州都督謚文

昭以上汾州府

房恭懿字慎言河南洛陽人性深沈有局量達於從政隋開  
皇中以蘇威薦超授澤州司馬有異績賜物百段良馬一匹

終海州刺史

澤州

馮孝慈仁壽中代州司馬驍勇善戰漢王諒舉兵遣將來攻  
孝慈與總管李景等拒守後與楊義臣援兵擊賊大破之城  
賴以全

侯莫陳乂仁壽中儀同三司漢王諒之亂與李景等共守代  
州多謀畫工拒守之術

呂玉仁壽中代州司法參軍驍勇善戰漢王諒反與總管李  
景等共相守禦城獲全

陳孝意河東人大業末爲雁門郡丞時長史多賊污孝意情  
節彌厲發奸摘伏動若有神吏民稱之劉武周反孝意與武

貞郎將王智辨率兵討之戰於下館城反爲所敗武周遂轉  
攻傍郡前郡丞楊長仁雁門令王確等竝桀黠爲無賴所歸  
謀應武周孝意陰知之族滅其家郡中戰慄莫敢異志武周  
引兵來攻孝意拒之每戰克捷堅守百餘日糧盡爲校尉張  
倫所殺

以上代州

姚暹大業中爲都水監先是鹽池患客水暹濬永豐舊渠兼  
築隄堰自安邑楊家莊西至臨晉五姓湖以入於河客水有  
所歸至今名其渠曰姚暹渠

解州

右隋二十六人

張後允蘇州崑山人父中有儒學隋漢王諒出牧并州引爲  
博士後允從父在并州以學行見稱時高祖鎮太原引居賓  
館太宗就授春秋左氏傳義師之舉後允首贊之貞觀中歷



授國子祭酒散騎常侍卒贈禮部尚書

劉政會滑州胙城人隋大業中爲太原鷹揚府司馬高祖爲太原留守政會率兵隸麾下制王威高君雅政會功也武德初授衛尉少卿留守太原調輯戎政遠近悅服劉武周進逼并州晉陽秦民薛深等以城應賊政會爲所擒密表論武周形勢賊平復官爵封邢國公卒謚曰襄

張文瓘字稚圭貝州武城人貞觀初舉明經補并州參軍時李勣爲長史深禮之嘗嘆曰圭稚今之管蕭吾所不及勣入朝文瓘與尉僚二人皆餞勣贈以佩刀玉帶而不及文瓘文瓘以疑請勣曰子無爲嫌若某猶豫少決故贈以刀欲其果于斷某放誕少檢故贈以帶欲其守約束若子才無施不可焉用贈因極推引歷拜同三品遂與勣同爲宰相晉侍中兼

太子賓客卒謚曰懿

李義拔魏州昌樂人舉進士累補太原尉時李勣爲并州都督察吏皆望風懼義拔獨廷折曲直勣甚禮之上元中累遷中書侍郎同三品致仕卒

韋安石京兆萬年人孝寬曾孫舉明經永昌元年爲并州司馬有善政則天手勞之曰聞卿在彼庶事從心善事表於能官仁明彰於鎮撫如此稱職深慰朕懷久視中由并州刺史拜鸞臺侍郎同平章事申書令封郇國公景雲二年坐事出爲蒲州刺史尋貶籍憤卒天寶初謚文貞

張柬之字孟將襄陽人登進士第調清源丞永昌元年以賢良召時年七十餘對策第一狄仁傑姚崇薦之累拜鳳閣侍郎同平章事誅張易之昌宗以功擢天官尙書同三品封漢

陽郡王加特進爲武三思所誣貶瀧州卒景雲中贈中書令  
謚文貞

富嘉謨雍州武功人舉進士長安中爲晉陽尉與同官吳少  
微友善先是撰碑頌皆以徐庾爲宗嘉謨與少微屬詞皆以  
經典爲本時人欽慕文體一變稱富吳體而太原人士實先  
化之嘉謨作雙龍泉頌乾燭谷頌少微撰崇福寺鐘銘詞最  
高雅作者推重長史張仁直待以殊禮坐必同榻中興初歷  
左臺監察御史卒

吳少微新安人舉進士長安中官晉陽尉長史張仁直重之  
嘗爲撰進九鼎銘表神龍初以薦拜右臺監察御史富嘉謨  
卒少微賦詩哭之尋病卒

谷倚魏郡人長安中官太原主簿以文詞著名與富嘉謨吳

少微時人謂北京三傑後留寓客卒

呂元泰爲清源尉神龍元年大水求言元泰上書言時政曰  
國家者至公之神器一正則難傾一傾則難正今中興政化  
之始幾微之際可不慎哉自頃營寺塔度僧尼施與不絕非  
所謂急務也林胡數叛獯虜內侵帑藏虛竭戶口亡散天下  
人失業不謂太平邊兵未解不謂無事水旱爲災不謂年登  
倉廩未實不謂國富而乃驅役飢凍雕鏤木石營構不急勞  
費日深恐非陛下中興之要也比見坊邑相率爲渾脫隊駁  
馬胡服名曰蘇莫遮旗鼓相當軍陣勢也騰逐喧譟戰爭象  
也錦繡夸競害女工也督斂貧弱傷政體也雜服相歡非雅  
樂也渾脫爲號非美名也安可以禮義之朝法侈靡之俗詩  
云京邑翼翼四方是則非先王之禮樂而示則於四方臣所

未諭書曰謀時寒若何必羸形體灌衢路鼓舞跳躍而索寒  
焉書聞不報

嚴挺之華州華陰人景雲中舉進士開元二年爲太原少尹  
殿中監王毛仲嘗使太原朔方幽州計會兵馬後累年仍牒  
太原索器仗挺之以不挾勅且毛仲寵幸久恐有變故密奏  
之泄任嚴整吏不敢犯及毛仲得罪上以挺之言忠擢爲刑  
部侍郎後李林甫嫉之出厯絳州刺史上問曰嚴挺之安在  
此其才可用林甫退召其弟損之曰上視絳州厚要當以事  
自解歸得見上且大用挺之稱疾林甫得奏卽言挺之願得  
閑官自養上恨比久之乃以爲員外詹事卒

李銳宗室子明皇時爲太原少尹遷汾州刺史善於職復爲  
太原少尹築天成軍完葺邊備卒贈尙書右僕射

馬炫汝州却人燧兄至德中李光弼鎮太原署掌書記常參軍謀光弼器焉歷連澗二州刺史以兵部尚書致仕卒

張建封字本立兗州人少喜文章能辨論慷慨尚氣自許以功名顯大曆末馬燧爲河東節度使奏爲判官特拜侍御史建中初燧薦之於朝楊炎將任以要職盧杞不喜會擇壽州刺史杞倉卒白用建封遂破李希烈歷徐泗濠節度營田觀察卒贈司徒

李說字嚴甫淮安靖王通之五世孫也馬燧節度太原辟悅署少尹遷汾州刺史李自良代燧復奏爲少尹精於職擢檢校禮部尚書節度使

崔元翰齊國公日用從子第進士馬燧表爲太原掌書記召拜知制誥訓辭溫厚有典誥風年七十餘卒

高銖字重權渤海人第進士署太原張宏靖幕府遷監察御史擢給事中以直諫著厯禮部尚書卒

高鎔字弱金銖弟第進士辟河東府參謀厯禮部侍郎知貢舉時稱得人轉吏部出爲鄂岳觀察使卒

李德裕字文饒趙郡人吉甫子元和十一年張宏靖鎮太原辟掌書記由大理評事得殿中侍御史十四年罷府從宏靖入朝厯相文宗武宗爲一時名臣

裴向字係仁聞喜人爲太原少尹行軍司馬兼御史中丞改汾州刺史轉鄭州以學行自飭厯官仁智推愛利及於人以吏部尚書致仕

崔戎字可大博陵人元暉從孫兩舉明經裴戎領太原署爲參謀請令戎至鎮州往諭王承宗承宗泣下裴遷充海甯沂

都國練觀察使卒贈禮部尙書

韋宙京兆萬年人丹子大中中盧鈞鎮太原表節度副使時  
回鶻破諸部入塞下鈞欲得信重吏視邊宙請往自定襄鴈  
門五原絕武州塞略雲中踰勾注徧見酋豪鏘論之視亭障  
守卒增其稟約吏不得擅以兵侵諸戎犯者死於是三部六  
番諸種皆信悅宙所在有幹能惠政累官嶺南節度同平章  
事卒

盧簡方盧鈞鎮太原表節度府判官會党項羌擾鈞使簡方  
督兵乘邊旁河相險集樹保障自神山至鹿泉縣三百里屢  
遏其衝賊不得聘候難便之累拜大同軍防禦使大開屯田  
練兵修闕沙陀畏附推義昌節度使入拜太僕卿領大同節  
度久之徙振武軍卒



李璋贊皇人絳子第進士盧鈞鎮太原辟爲從事大中末入朝仕至宣歙觀察使

劉崇龜字子長滑州胙人第進士廣明元年鄭從讜鎮太原奏爲節度判官檢校吏部郎中御史中丞中和三年入朝累遷清海軍節度使卒崇龜蒞政號精明

李渥乾符初左拾遺鄭從讜鎮太原奏掌書記

蕭邁蘭陵人宰相真子咸通五年進士辟太原從事中和初歷兵部侍郎同平章事封楚國公襄王僭召邁作冊苦辭罷爲太子太保邁移疾以弟邁爲永樂令往從之僖宗還賜死於永樂邁爲大臣有峻望時不幸不以令終人士惜之

鄭畋字古文滎陽人亞子第進士咸通中劉瞻鎮北門辟爲從事入朝爲虞部員外郎右丞鄭薰沮之復出爲從事後鎮

鳳翔以討巢賊功拜司空平章事卒於龍州謚曰文昭配享

僖宗廟庭

以上太原府

劉齊賢魏州觀城人道祥子襲封自侍御史出爲晉州司馬高宗聞其方正甚禮之時將軍史興宗從苑中弋獵因言晉州出好鶴劉齊賢見爲司馬請使捕之上曰劉齊賢豈覓鶴人耶卿何以此待之遂止永淳元年累遷黃門侍郎同平章事代裴炎爲侍中力辨炎事再貶吉州被害

崔倫字敘及深州安平人第進士歷吏部員外郎陷祿山不汗僞官下遷晉州長史李齊物認其忠授長安令使吐蕃拘留六年不屈卒贈工部尙書

以上平陽府

姜晦秦州上邽人柔遠子起家蒲州參軍歷巡邊使吏部侍郎歷任有聲終海州刺史

唐臨京兆長安人貞觀初爲萬泉丞縣有輕囚十數人會春暮時兩臨白令請出之令不許臨曰明公若有所疑臨請自當其罪令因請假臨召囚悉令歸家耕種與之約令歸繫所囚等皆感恩貸至時畢集詣獄歷御史大夫卒

徐有功國子博士文遠孫舉明經累補蒲州司法參軍襲東莞縣男爲政寬仁不行杖罰吏人感其恩信遞相約曰若犯徐司法杖者服必斥罰之由是人爭用命終於代滿不戮一人延載元年歷遷司刑丞司刑少卿獨存平恕前後濟活者數十百家時人比漢于張轉司僕少卿卒贈司刑卿中宗贈越州刺史

徐彥伯兗州瑕邱人名洪以字顯七歲能爲文結廬太行山下薛元超安撫河北表其賢對策高第調蒲州司兵參軍時

司戶韋嵩善判司士李巨工書而彥伯屬辭時稱河東三絕  
後移蒲州刺史以近畿上南郊賦一篇辭致典釋歷太子賓  
客開元二年卒今虞鄉有所撰柏梯寺碑

齊澣義豐人爲蒲州司功參軍先天中侍中魏知古表薦之  
時稱知人

蔣將明常州義興人天寶末辟河中使府以計佐其帥全并  
潞等州後被拘佯狂以免號王巨引致幕府歷集賢殿學士  
卒

趙驊字雲卿鄆州穰人開元中進士天寶中爲河東丞採訪  
使韋直以驊操履清直雅推敬之表爲賓佐驊性孝弟敦交  
道雖艱危不改其操天寶中語行義者必稱之歷祕書少監  
卒

趙復永樂尉至德二年賊將崔乾祐守潼關郭子儀大破之時復與河東司戶韓旻司士徐昊宗子李藏鋒等在蒲州密謀俟王師至爲內應及子儀至復等斬賊守陴者開門納子儀乾祐奔

王翊太原人大厯中爲河中少尹充節度留後悍將凌正橫暴擾軍政約其徒夜謀斬關以逐翊有告者翊縮夜漏數刻以差其期賊驚不敢發而遁擒正誅之軍城又安厯汾州刺史建中二年拜振武軍使後爲東畿防禦使卒謚肅

高郢字公楚衛州人第進士爲郢子儀朔方掌書記力救判官張曇下徙猗氏丞李懷光奏爲從事累轉副元帥判官檢校禮部郎中懷光將歸河中郢言西迎大駕豈非忠乎懷光忿不聽及歸鎮又欲悉眾西時渾瑊軍孤羣帥未集郢與李

鄜誓死駐之。屬懷光長子瑾侯郢，諭以順逆。瑾震懼流涕。明年春，郢與都知兵馬使呂鳴岳、都虞侯張延英同謀，開遣上表及受密詔，事洩。二將立死。懷光集眾將殺郢，抗辭無所迴。隱憤氣，感發，觀者泣下。懷光慙沮而止。諫議大夫孔巢父使河中，遇害。郢撫而哭之。及懷光誅，李晟表其忠。馬燧辟掌書記。貞元末，累拜同平章事，罷復授尚書左僕射，致仕卒。

謚貞。

李鄜，字建侯，江夏人。舉進士。李懷光辟，置幕府，累擢監察御史。懷光據河中，鄜與母妻陷焉。因給懷光以兄病臥，格且革。母欲往視，懷光許可。戒妻子無偕行。鄜私遣之。懷光欲加罪，謝曰：「鄜籍在軍，不得爲母駕。奈何不使婦往？」懷光止不復問。後與高郢刺賊盧實，及所以攻取者，白諸朝。德宗手詔褒答。

懷光覺嚴兵召二人問之。郿詞氣不撓。三軍爲感動。懷光不殺囚之。河中平馬燧破械致禮。表佐其府。以言不用罷歸。洛元和初爲河東節度使。入爲鹽鐵轉運使。後自淮南召拜門下侍郎。同中書門下平章事。因辭致仕。

張固字直之。河南偃師人。有吏才。爲河中府法曹參軍。攝虞鄉令。有能名。遂署河東從事。又攝絳州事。元和四年有事適東方。卒於汴。友人韓愈爲作墓碣銘。

李巨川字下己。隴右人。唐初學士。道元之後。王重榮鎮河中。辟爲掌書記。時車駕在蜀。重榮匡合諸藩。協力誅寇。軍書奏請。堆案盈几。巨川文思敏速。翰動如飛。傳之鄰藩。無不聳動。重榮收復功。巨川之助也。及重榮爲部下所害。朝議罪參佐。貶爲漢中掾。華帥韓建請掌書記。代建傳檄天下。請助轉餉。

特授諫議大夫光化初朱全忠陷河中進兵潼關建遣巨川至河中見全忠指陳利害全忠聞巨川所陳心惡之判官敬翔復畏其才高遂遇害

韓偓字致光京兆萬年人第進士佐河中幕府累拜翰林學士與崔胤定策誅劉季述進承旨爲朱全忠所惡貶官南依

王審知卒

以上蕭州府

宋璟邢州南和人耿介有大節好學工文辭第進士調上黨尉居官鯁介景雲初以吏部尙書同三品開元四年又以吏部兼侍郎封廣平郡公後罷以尙書右丞相致仕卒贈太尉謚文貞

陸長源字泳之吳人乾元中辟昭義節度薛嵩幕府嵩侈汰常從容規切嵩曰非君安能爲此歷宣武軍司馬兵變遇害



贈尚書右僕射

魏瑒潞州府長史兼御史中丞寶應元年爲大元帥府兵馬使會回紇討賊爲登里可汗榜捶死

盧頊潞州節度王虔休掌書記軍司馬元誼據潞州虔休破之復遣頊見誼陳利害誼請朝請卽以頊爲潞州別駕使守

孔戡字君勝巢父從子第進士以大理評事佐昭義李長榮節度府盧從史代之留爲書記從史與王承宗田緒陰相連結戡始陰爭不從後秉筆至不軌之言極諫以爲不可從史始若受其言後益恣因謝病歸揚州李吉甫表置幕府戡未應從史曰是欲舍我而從人耶卽誣以罪奏三上詔分司東都卒從史敗追贈司動員外郎

烏重允字保君河東將承玘子也少爲潞牙將兼左司馬節度使盧從史奉詔討王承宗陰與賊連吐突承璀將圍之以告重允乃縛從史帳下士持兵合譴重允叱曰天子有命從者賞違者斬士斂手還部無敢動憲宗嘉其功擢河陽節度使累遷檢校司空封邠國公

賈直言河朔舊族也劉悟辟署義成府後徙潞亦隨府遷監軍劉承偕與悟不平陰與磁州刺史張汶謀縛悟送闕下以汶代節度事汶悟以兵圍承偕殺小使直言遽入責曰司空縱兵脅天子使者是欲效李司空邪他日復爲軍中所指笑悟聞感悔匿承偕於第以免悟每有過必爭故悟能以臣節光明於朝悟死子從諫不發喪召大將劉武德等矯悟遺言與鄰道使共表求襲位直言入讓曰父死不哭何面目見山

東義士乎從諫曰欲反耳直言仰天哭曰爾父提十二州地歸朝廷爲功臣然以張汝故自謂不潔淋頭卒羞死耶今日乃欲反耶從諫起抱直言項哭曰計窮而然直言曰君何憂無土地今脅朝廷正速死耳若從武德謀吾見劉氏爲元濟矣從諫拜曰唯大夫救之直言乃自攝留後使從諫居喪初從諫惟郛兵二千同謀直言旣折之軍中遂安太和九年卒贈工部尙書

唐漢寶儉之裔孫常參昭義幕府以劉稹拒命固諫合族爲稹所害

李佐之潞州觀察使劉從諫病諷使還東郡不聽然亦感服諸將嫌其異議令奴告佐之漏軍中虛實稹殺之

李師晦宗室子晝蕃馬李漸之孫也爲劉從諫潞州從事

諫謀不軌遂隱居黎城山路州平朝廷嘉之就拜伊闕令  
韋虛心京兆萬年人漢子舉孝廉歷潞州都督府長史所在  
官吏振肅威令甚舉拜東京留守卒謚正

任國京兆三原人明敏善談辨李嗣昭節度昭義辟觀察支  
使梁兵築夾城圍潞州踰年而晉王薨晉兵救潞者皆解去  
嗣昭危甚問圍去就之計圍勸嗣昭堅守以待不可有二心  
已而莊宗攻破夾城聞圍爲嗣昭畫守計甚善之由是益知  
名其後嗣昭與莊宗有隙圍數奉使往來辨釋護構嗣昭卒  
免於禍圍之力也嗣昭戰胡柳擊敗梁兵圍頗有功嗣昭戰  
沒於鎮州圍代將其軍號令嚴肅遷節度判官召還後拜同  
中書門下平章事致仕安重誨矯制殺之

以上略  
安府

薛季昶絳州龍門人武后時自御史左遷平遙尉復拜御史

封清河郡公謚忠所至介潔自守明吏治以強正稱

薛元曖隰城丞卒於官祀名宦妻林氏丹陽太守洋之妹善

屬文訓子彥輔等舉進士

杜審言襄州襄陽人第進士為隰城尉歷修文館直學士卒

贈著作郎

徐堅字元固湖州長城人舉秀才及第為汾州參軍事累遷

給事中開元中官集賢院學士堅性敏於典故多所請識凡

七當譏次高選卒贈太子少保謚曰文

崔隱甫貝州武城人隋散騎侍郎儻之曾孫解褐左玉鈐衛

兵曹參軍遷殿中侍御史內供奉浮圖惠範倚太平公主脇

人之女隱甫劾狀反為所擠貶邛州司馬元宗立擢汾州長

史兼河東道支度營田使累遷刑部尚書東都留守

以上汾州府

唐璿字休璟京兆始平人明經高第永濟中爲朔州長史突厥圍豐州都督崔知辨戰死時議棄豐保靈夏璿上疏詳陳其利害高宗從之以功封宋國公同中書門下三品卒

朔平府

王忠嗣華州鄭人威毅寡言有武略開元中試守代州別駕大猾閉門自斂不敢干法累遷朔方節度使

代州

韋縱貞元十一年以大理評事知安邑縣鹽池事明審善斷羣情帖服祀名宦

馮興以詹事司直知解州鹽池平直守制阜財有經

盧從愿字子龔相州臨漳人舉明經授夏縣尉累官吏部侍郎有名歷刑部尚書開元十六年坐事貶絳州刺史後拜吏部尚書卒謚文

崔日用滑州靈昌人舉進士初爲芮城尉累遷黃門侍郎參

知機務封齊國公終并州大都督府長史謚昭

呂元膺東平人姿儀瓌秀有器識策賢良高第調安邑尉累官河東節度使入拜吏部侍郎正色立朝有台宰望以疾改

太子賓客卒贈吏部尚書

以上解州

陸展字祥文陝人光啟二年進士爲絳州刺史唐彥謙判官嗜學有才思鄭從讜寓絳州與之談宴無間先後稱之於朝位至清顯厯同平章事再當國罷遇害於白馬驛絳州

甯嘉助聖厯三年爲永和丞愍懷被害宮府僚吏莫敢近嘉助解衣裹首號哭時人義之宗楚客聞而大怒收付制獄貶平興丞尋卒睿宗初下制曰甯嘉助能重名節事高樂向幽塗已往生氣凜然靜言忠義追存褒寵可贈永和縣令州李素立趙州高邑人貞觀中累拜揚州都督府司馬初突厥

鐵勒部內附卽其地爲瀚海都護府卽燕然都護也詔素立領之時闕泥熟別部數梗邊素立以爲不足用兵遣使諭降夷人感其惠率馬牛以獻素立止受酒一杯歸其餘乃開屯田立署次虜益畏服封高邑縣侯綿州刺史後徙蒲州會卒高宗特廢朝一日謚曰平

李景畧幽州良鄉人大厯末客河中閩門讀書李懷光爲朔方節度景畧署巡官五原將張光毅其妻以貨市獄前後不能決景畧數實論殺之旣而有若如厲者敬謝庭中如光妻狀顯名於時回紇將南寇朝議當得良將舉景畧拜豐州刺史天德軍都防禦使窮塞苦寒地瘠鹵邊戶勞瘁景畧至節用約己與士同甘苦鑿感應永清二渠溉田數百頃儲廩器械畢具威令肅然以禮制虜聲雄北疆回紇畏之卒於屯贈



工部尚書

任迪簡京兆萬年人舉進士爲天德軍使李景畧判官性重厚嘗軍宴行酒者誤以醴進迪簡以景畧性嚴慮坐主酒者乃勉飲盡之而僞容其過以酒薄白景畧請換之於是軍中皆感悅貞元二十年景畧卒畧以其長者議請爲帥監軍聞之拘迪簡於別室軍服連呼而至發肩取之表聞德宗使察之具以軍情奏除豐州刺史天德軍使時公私缺乏欲饗士而無所給至與門下同糗食身居戟戶踰月軍中感其公請安臥內三年上下完充入拜太常少卿出鎮易定以疾改太子賓客卒謚曰襄以上歸綏道

右唐七十三人

盧質字子微河南人幼聰慧善屬文事唐爲祕書郎後游太

原晉王以爲河東節度掌書記質與張承業等定議立莊宗爲嗣莊宗卽位欲以質爲相質性疎逸不欲任責固辭不拜拜太原尹北京留守晉天福中卒年七十六謚文忠

何瓚閩人唐末舉進士及第莊宗爲太原節度使辟爲判官張承業卒代知留守事爲人明敏通於吏事外若疎簡而內頗周密馬步都虞侯孟知祥等胥以軍禮見瓚常繩知祥以法莊宗建大號拜諫議大夫明宗時拜西川節度副使卒呂琦字輝山幽州安次人美風儀重節概少喪其家游學汾晉之間唐莊宗鎮太原以爲代州軍事推官後拜端明殿學士晉天福中卒

李承勳爲太原少尹晉王遣使燕賀册尙父至燕而劉守光已僭號有司迫承勳稱臣承勳不屈以列國交聘禮入見守

光怒殺之

路德延相國巖之姪嶽之子也時謂才俊擢進士第授河中判官爲西平王朱友謙幕僚友謙背梁乞降於晉并使初至禮遇方謹德延上言語及之友謙憤因投德延於黃河

張昭字潛夫濮州范縣人攜文謁興唐尹張憲憲奇之署推官憲爲北京留守昭亦從至晉陽能成憲之節符彥超曰推官正人無得害之又逼昭爲榜安撫軍民事平爲北京留守推官加殿中侍御史內供奉官賜緋入宋爲吏部尙書卒昭博通學術書無不覽云

右後唐六人

段希堯河內人晉高祖爲河東節度使以希堯爲判官高祖軍屯忻州軍中有擁呼萬歲者高祖惶惑不知所爲希堯勸

斬其亂首乃止高祖將舉兵與賓佐謀希堯以爲不可高祖雖不聽然重其爲人不之責也累遷禮部尙書卒

吳巒字寶川鄆州盧縣人清泰中爲大同節度判官遼師過雲州節度使沙彥珣出城迎謁爲遼所執城中推巒主州事巒卽閉門拒守遼以兵圍之晉高祖立以雲州入於遼而巒猶守城不下遼師圍之凡七月高祖義巒所爲乃以書告遼使解兵去而召巒爲武甯軍節度副使後殉城於貝州

右後晉二人

張崇祐廣順二年爲解州刺史兩池權鹽使多規畫鹽池利害顯德二年改德州又改澤州後在泗州勸李重進舉義被害

程光遠顯德間由進士以大理司直兼監察御史守翼持清

介杜賄遺弊絕風清百姓戴之如父母風厲著聞鎮邊使王德都虞侯張進鎮翼常戒其下曰勿犯程公其見嚴憚如此

右後周二人

李驥眞定人起家河東幕僚慷慨善談兵饒技略天福十二年高祖以世祖爲太原令擢驥少尹以佐之居無何隱帝遇害侍中郭威遣馮道等迎相陰公贊於徐州是時人皆知威非實意世祖心獨喜以爲吾兒爲帝夫何患驥因是陰說世祖曰知幾其神時不可失郭公舉兵犯順其勢不能爲漢臣必不爲劉氏立後公不如疾引兵踰太行據孟津俟徐州相公卽位然後還鎮則郭公不敢動矣不然且爲所賣世祖大罵曰驥腐儒欲離間我父子命左右牽出斬之驥呼曰吾負經濟才而爲愚人畫計死誠宜矣然吾妻病不可獨存願與

俱死卽并戮其妻已而威果自立爲皇帝弒湘陰公於宋州  
世祖大哭曰吾不用忠臣之言至於此爲驥立祠太原

鄭珙青州人少有異才世祖行太原尹時辟珙留守判官乾  
祐初政在大臣樞密使郭威新討三叛立大功而與世祖有  
隙世祖頗不自安珙因進曰晉陽英雄天下地形險固十州  
征賦足以自給公爲宗室老不以此時爲計後必爲人所制  
世祖曰子言正合吾意遂表募兵四指揮以備契丹於是收  
豪傑籍民益兵與威隱若敵國然未幾卽位於太原除珙中  
書侍郎同平章事

李光美河南人世祖自立於太原署光美容省使光美常爲  
直省素諳前後典故至是庶事草創朝廷制度儀注一出光  
美之手綱舉目張頗得大體時人比於晉王彪之唐裴冕云

右北漢三人

盧拔字錫圭淄州淄川人第進士以太常丞通判并州至道中就加太常博士咸平二年選爲開封府判官及幸澶淵轉進有勞特遷于隰州推官士宗秩終右諫議大夫

劉渙字仲章保塞人文質子以父任監并州倉天聖中上書請章獻后還政將黥隸呂夷簡薛奎力救得免後擢右正言會河東走馬承受奏渙他事坐貶尋知遼州熙甯中以工部尚書致仕卒

陳從易字簡夫泉州晉江人第進士爲嵐州團練推官仕至龍圖閣直學士卒從易好古篤行憲官以清德聞

陳薦字彥升邢州沙河人第進士從韓琦河東幕府薦性木強簡澹獨琦知之最深每語人曰廉於進勇於退嫌疑間毫

髮不處與人交久而不變如彥升者無幾也

張載字子厚邠人嘉祐二年登進士第始仕邠縣司法遷丹徒雲巖縣令熙甯中爲崇文館校書同知太常禮院世稱橫渠先生清祐初封邠伯從祀孔子廟庭

呂景初字冲之開封酸棗人舉進士通判并州後爲殿中侍御史屢獻讜言擢天章閣待制知諫院卒

司馬光字君實夏縣人第進士以集賢校理從龐籍辟通判并州三上章請建國嗣麟州屈野河西多良田夏人蠶食其地爲河東患籍命光按視光建言築二堡募民耕之耕者眾則糴賤亦可漸紓河東貴糴遠輸之憂籍從其策而麟將郭恩勇且狂夜渡河不設備沒於敵籍得罪去光三上書自引咎不報仕至左僕射卒贈太師謚文正



蘇過字叔黨眉州人軾子以詩賦解兩浙路禮部試下任右承務郎徽宗時監太原府稅時游晉溪終通判中山府有圃名小斜川自號斜川居士時稱小坡蓋以軾爲大坡也

陳知白爲太原縣尉分引晉水灌田民用大饒

賀鑄字方回衛州人工長短句隸籍右選監太原工作有貴人子同事驕倨不相下鑄廉得盜工作物屏侍吏問之密室以杖數曰來若某時盜某物爲某用某時盜某物入於家然乎貴人子惶駭謝有之鑄曰能從吾治免白法官卽起自袒其盾杖之數十貴人子叩頭求哀卽大笑釋去自是請挾氣力頡頏者皆側目不敢仰視後換通直郎居吳卒

鄭驥字潛翁信州玉山人元符進士通判岢嵐軍高宗初以直祕閣知同州兼沿河安撫使殉城謚威愍

以上太原府

劉保勳字修業河南人處讓子後唐清泰中裁十許歲攝路州左司馬宋太平興國初通判晉州太宗征晉陽以戶部郎中爲隨軍轉運使兼勾當北面轉運事又與侯陟同勾當軍前諸事會陝西北路轉運事雷德驥調發沁州軍糧後期詔以保勳代之太原平命知并州逾年召還後知開封府雍熙三年以浚溝之役陷淖卒

崔遵度字堅白淄川人純介好學太平興國進士爲臨汾主簿有惠政部晉州芻糧三抵綏州涉無定河河沙與水混流無定跡陷溺相繼遵度憫之著銘以紀焉端拱初轉運副使夏侯滂上其勤狀召歸擢著作佐郎後爲昇王友卒

李若谷祥符間爲翼城縣主簿振厲學校貧民有不能嫁娶者捐俸餘以給士民咸愛之

劉隨字仲豫開封考城人第進士爲右正言坐不察舉人私授策辭累徙通判晉州還朝遷右司諫累疏言丁謂王欽若惡又諫章獻后終天章閣待制隨臨事明銳敢行人號水晶燈籠

王巖叟字彥霖大名清平人十八舉明經科鄉與省試廷對皆第一熙甯中監晉州折博煉鹽務元祐中拜中書舍人滕甫帥太原爲走馬承受所撼徙穎昌巖叟封還詞頭言進退帥臣理宜重愼今以小臣一言易之使後人畏憚不自保此風浸長非委任安邊之福乃止六年簽書樞密院事罷爲端明殿學士卒

李若水字清卿洺州曲周人上舍登第調平陽府司錄靖康中以著作佐郎爲使見金宗翰於雲中纔歸兵已南下復假

徽猷閣學士往至中牟還晉禮部尙書殉節青城謚忠愍上

平陽府

顏太初字醇之顏子四十七世孫居彭城博學有雋才第進士爲臨晉主簿政聲焯著因事至同州葬通判宋武父子蘇舜欽表其事於墓左後爲南京國子監說書卒

朱壽昌字康叔揚州天長人以父異蔭至知廣德軍母劉氏異妾也方娠而出壽昌生數歲始歸母子不相見五十年熙寧初與家人辭訣棄官入秦遂得之於同州壽昌以養母故求通判河中府數歲母卒居喪幾喪明累官司農少卿卒

孫載崑山人紹聖初爲河中府戶曹更三守皆立威嚴者載獨與之爭持曲直不事詭隨後除河東轉運判官時稱爲循吏

晁詠之字以道濟州鉅野人補之從弟舉進士又舉宏詞一時傳誦其文爲河中教授元符末應詔上書論事罷官後提點崇福宮卒

韓宗厚長社人億之孫也以蔭官至慶成軍使兼知榮河縣性通敏篤好學問長於吏治雖案牘叢委一視察其隱吏人畏惕不敢欺嘗受學於王安石安石旣輔政同時預丈席者多被薦擢宗厚輒齟齬不諧故不得大用著有文集百卷卒於官朱光裔嘗志其墓

郭忠孝字立文河南人達子受易中庸於程氏第進士宣和間爲河東路提舉盜販鹽者眾止治其首餘悉寬貸宰相王黼怒之坐免靖康初命提點永興軍刑獄措置保甲忠孝得勝兵三萬遣兵趣澤潞聽宣撫司節制永興帥范致虛入援

忠孝曰金人深入而河東無守備不致半困乎願分兵走太行扼其歸路遂以蒲縣軍三千破金人于猗氏踰絳州破太平砦入平陽郭會滑澠師潰乃引還後殉永興城

李之儀字端叔滄州無棣人登第三十年乃從蘇軾於定州徽宗初提舉河東常平坐爲范純仁遺表作行狀編管太平

終朝請大夫之儀工尺牘軾謂入刀筆三昧以上蒲州府

苗時中字子居壺關人家宿州以蔭入官爲潞州司法參軍郡守欲入一囚于死執不可守怒責甚峻時中曰甯歸田里法不可奪守悟而聽之熙甯中爲河東轉運使終戶部侍郎李昭玘字成季濟南人第進士以祕閣校理通判潞州潞民死多不葬昭玘斥官地畫兆窆具棺衾作文風曉之俗爲一變靖康初以起居舍人召而已卒昭玘自號樂靜先生寓意

法書圖畫貯于十囊命曰燕游十友云

趙伯臻通判隆德府金兵至與知府張確協力拒守城破死之張彥適府司錄也同時死

以上路安府

趙瞻亳州永城人舉進士第英宗治平初自都官員外郎除侍御史以濮議持詔曉天下及使還聞呂誨等諫濮議皆罷去乞與同貶遂通判汾州政以愛民爲本神宗朝遷司封員外郎知商州累官樞密直學士以中大夫同知院事卒謚曰懿簡有著述行世

陳膏汾州教授佐守臣張克戡捍禦金人有功

司馬樸字又季夏縣人育於外祖范純仁調晉甯軍參軍通判不法轉運使王似調樸伺其過樸曰下使陷長官不惟亂常人且不食吾餘矣不敢奉教似賢而薦之靖康初入爲右

部虞司員外郎

以上汾州府

宋昌言趙州平棘人以蔭爲澤州司理參軍州有殺人獄昌言疑其冤堅請緝捕後果得眞犯者仕至少府監卒

陸餘慶吳郡人慶歷初爲陽城縣尉時靈勝二州党項爲寇詔餘慶論以恩信寇率眾歸附民甚德之子璪爲西河太守亦有異績封平恩縣男

時敦彭門人任澤州判官政事詞翰推重一時

以上澤州府

崔鷗字德符陽翟人第進士徽宗初極論司馬光忠章惇姦蔡京籍爲邪黨移病屏處十餘年宣和六年起通判甯化軍召入道中草疏曰數十年來王公卿相皆自蔡京出要使一門生死則一門生用一故吏逐則一故吏來更持政柄無一人立異無一人害己者此京之本謀也海宇胥壯之晉龍圖



閻直學士卒

張汝明字舜文廬陵人第進士徽宗時以司門員外郎通判甯化軍地界遼文移數往來汝明名觸其諱遼以檄暴於朝安撫使問故眾欲委罪於吏汝明日詭辭欺君吾不爲也責監壽州麻步場晚知岳州卒

以上甯武府

李京字伯升趙州人第進士歷平定軍判官後爲監察御史屢上直言爲鄉里吳鼎臣所陷貶卒

平定州

裴莊字端己閬州閬中人蜀第明經太宗時權忻州錄事參軍先是并州倚積軍儲條制甚峻掌出納者常十餘人莊代之獨任其事擢授絳州防禦推官提點并嵐二州緡帛芻糧改遼州判官仍洩舊局雍熙三年命將巡邊掌隨軍糧料內客省使楊守一稱薦之授大理寺丞時遷河朔降戶於汝洛

遣莊安輯之俄通判忻州未上道改澶州景德中知潞州祀汾陰爲北嶽加號冊禮副使撰北行記三卷以獻卒年八十

張佶渭南人端拱至道年忻州通判史稱勤幹威惠  
胡則字子正婺州永康人太宗時第進士調惠州錄事參軍時靈夏用兵轉運使索湘命部送芻糧爲一月計則曰爲百日備尙恐不支奈何爲一月邪湘懼無以給遣則入奏太宗因問邊策對稱旨顧左右曰州縣豈乏人命記姓名中書後李繼隆師久不解湘語則曰微子幾敗我事一日繼隆移文轉運使曰兵且深入糧有繼乎則告湘曰彼師老將歸欲以糧乏爲辭耳姑以有餘報之後果爲則所料仁宗初權三司使通京東西陝西鹽法民便之後遷兵部侍郎致仕卒

張旨字仲微懷州河內人仁宗時通判忻州復通判府州元  
昊攻不能下後提點河東路刑獄范仲淹歐陽修胥言其鷲  
武有謀略除閣門使固辭後以光祿卿知潞州移知晉州請

判西臺卒

以上忻州

武英字漢傑太原人仁宗時以右班殿直爲忻代州同巡檢  
會州將出獵留飲英曰今空郡而來萬一敵乘間入城奈何  
旣而敵百騎果入寇英領眾左右馳射悉擒獲之以功遷左  
班殿直後戰沒于好水川贈邢州觀察使

姚孝錫豐縣人徽宗時調代州兵曹金兵入雁門州將議以  
城降官屬惶懼孝錫投牀大斡略不爲意大府遂注孝錫爲  
五臺簿因家五臺善治生歲饑出粟萬石賑之全活甚眾

史抗濟源人宣和末爲代州沿邊安撫副使金圍代急抗夜

呼其二子稽古稽哲謂曰吾昔語用事者厲門控制一道宜  
擇師增戍以謀未形之患若使橫流則無所措矣言雖切皆  
不吾省今重圍既固外援不至吾用六壬術占之明日城必  
陷吾將死事汝輩亦勿以妻子爲念也能聽吾言當令家屬  
自裁然後同赴義二子泣曰唯命明日城果破父子三人突  
圍力戰死於城隅

以上代州

孔文仲字經父臨江新喻人舉進士南省第一制舉對策九  
千言言新法不便罷通判保德軍時征西夏眾數十萬皆道  
境上久不解邊人厭苦文仲陳三不便曰大兵未出而丁夫  
預集河東雇夫勞民而損費諸路出兵首尾不相應虞夏商  
周之盛未嘗不外侮然懷柔制禦之要在彼而在此也元  
祐初召入仕至中書舍人卒蘇軾歎曰世方嘉軟熟而惡崢

嶠求勁直如吾經父者今無有矣

侯贊并州太原人父義漢遼州刺史贊以蔭補殿前承旨周顯德中遷供奉官江南平命領三門集津發運事宋初爲諸衛將軍朝廷歲仰關中穀麥以給國用命贊掌其事歷三十年國用無闕累遷至右武衛將軍卒年七十四贈本衛上將軍

張硯延平人元祐間通判解州軍事兼管內勸農事政尙寬簡吏民多信懷焉

李綽元祐間知解鹽池事自王峪口築堰防池由東而北至苦池灘排條山諸谷之水并白沙泛濫之水胥由池以達於渠後人因名其堰曰李綽堰

趙賀字餘慶開封封邱人舉毛詩及第爲大理評事鹽池吏

欺緝錢選賀往解州鈎校出入悉得其奸仕至給事中卒賀  
精明吏不敢欺人目爲趙家關謂如關梁不可越也以上解州

呂夷簡字坦夫壽州人蒙正弟子第進士補絳州軍事推官

相仁宗封許國公以太尉致仕卒贈太師中書令謚文靖夷

簡於天下事屈伸舒卷動有操術

富弼字彥國河南人舉茂材異等通判絳州歷相三朝累封

韓國公卒謚文忠

李大臨字才元華陽人第進士爲絳州推官杜衍安撫河東

薦爲國子監直講終天章閣待制與宋敏求蘇頌稱熙甯三

舍人以上絳州

薛奎字宿藝絳州正平人第進士眞宗時任隰州軍事推官

州民嘗聚博僧舍一日盜殺寺奴取財去博者適至血偶流

衣邏卒捕送州考訊誣服奎獨疑之白州緩其獄後果得殺人者累官參知政事卒謚簡肅

劉奉世字仲馮臨江新喻人做子第進士元祐七年僉書樞密院事章惇當國乞免去紹聖中邢恕劾之再貶隰州團練副使政和中終端明殿學士奉世優於吏治政尙安靜云

姚坦字明白曹州濟陰人開寶中以尙書擢第調補江陵尉歷隰州推官將作監丞太平興國三年爲著作佐郎通判唐州八年諸王出閣詔給諫以上於朝班中舉年五十以上通經有文行者以備宮僚乃以坦爲皇子翊善終光州知州上

右宋五十三人

張儉宛平人性端慤不事外飾統和十四年舉進士第一調

雲州幕官故事車駕經行長史當有所獻聖宗獵雲中節度使進曰臣境無他產惟幕僚張儉一代之寶願以爲獻先是上夢四人侍側賜食人二口至聞儉名始悟召見容止樸野訪及世務占奏三十餘事由此願遇特異踐歷清華號稱明幹後仕至太師加尚父封陳王卒

大同府

耶律侯哂初爲西南巡邊官以廉潔稱重熙十一年党項部人多叛入西夏侯哂受詔巡西邊沿河要地多建城堡以鎮之役致仕卒

歸綏道

### 右邊二人

盧孝儉宣德州人登天眷二年第調憲州軍事判官累官太原少尹大定二年陝西用兵尙書省發本路稅粟赴平涼充軍實期甚嚴迫孝儉輒易以金帛馳至平涼用省而不失期



并人稱之

太原府

伍禮厚興定中任吉州同知元兵陷吉與其妻墜崖死

平陽府

劉從謙字光甫以明經擢進士泰和元年任萬泉主簿寬猛

適中舉錯有法嘗罄俸資以修廟學祀名宦

李復亨字仲修河津人年十八舉進士調臨晉縣主簿護送官馬入府宿逆旅有盜殺馬復亨曰不利而殺之必有讐者盡索逆旅同人過客同邑人囊中盛佩刀謂之曰刀蟻馬血火煨之則刃青其人款服果有仇遷南和令累官參知政事兼修國史終安國軍節度使

康錫字伯祿甯晉人崇慶二年進士以司農丞出爲河中府治中氣質重厚公家事知無不爲與雷淵冀禹錫齊名人以公輔器推之元兵陷河中投水死

侯小叔河東人爲河中府判官權安撫副使散家財以賞戰士元兵圍河中急人勸小叔降之皆斬密遣經歷官張思祖潰圍出奔告於汴京明日城陷小叔死之

以上蒲州府

梁鐘范陽人明昌間爲昭義軍節度使觀察判官有惠政民祀之

女奚烈資祿咸平人爲潞城簿平政刑敦禮教吏憚其威民興於行

楊敏中淄州人先爲屯留尉致仕家居貞祐初元兵取淄州與州判官齊鷹揚募兵備禦城破被執不屈死贈昭勇大將軍同知橫海軍節度使事

完顏六斤中都人宣宗時以元帥右監軍守潞州與元兵力戰死贈御史大夫

馬市潞州都統興定元年元兵徇潞州甫死之

見武職重出

王無咎磁州武安人爲昭義軍節度副使金亡不仕徙樂平築室於邑之秦山以山水自娛號青峯有秦山小隱圖名公

多所題咏

以上潞安府

董時中字紹祖洛州人好學強記擢皇統九年進士調澤州軍事判官改平遙丞有劇賊王乙素凶悍不可制師中捕得杖殺之一境遂安時大軍後野多枯藁縣有遺櫬寓於驛舍者悉爲葬之遷綿上令後仕至尙書左丞卒謚文定

完顏宗璧宗室子少恬靜好學以賢雅稱大定中同知石州軍事廉潔自持有聲譽及代去父老作去思堂於盧橋璫石之東繪其像堂壁

石抹元毅咸平府路猛安人明昌中以最遷汾陽軍節度副

使時石嵐間賊黨嘯聚肆行剽掠朝廷命元毅捕之賊畏而遁元毅追襲盡殪之一境以安遷同知武勝軍節度使事別郡有殺人者屢鞠不伏元毅訊不數語卽具服河東北路田多山坂磽瘠大比時定爲上賦民力久困朝廷命相地更賦元毅以三壤法平之民賴其利後戰歿於撫州

以上汾州府

李瞻劄州玉田人遷進士天會間累遷德州防禦使爲政寬平民懷其惠正隆末招忠順軍節度使

丁暉仁字藏用宛平人冲澹寡欲讀書之外無他好皇統二年登進士第自丞令累遷至刺史所在有治聲改同知西京留守首興學校以明養士之法終陝西轉運使

曹望之字景蕭遼季自臨潢移家宣德除西京教授大定中爲德州防禦使有惠政百姓爲立生祠改同知西京留守事

上書論便宜事多見採納仕至戶部尚書

馬惠迪鄆陰人由進士歷昌邑令尚書令史大定中出爲西京留守判官以治最擢同知崇義軍節度使

劉仲洙字師魯順天宛平人大定三年登進士第歷龍門主簿章宗卽位除西京路提刑副使先是田穀等以黨罪廢錮者三十餘家仲洙知其寃上書力辨帝從之乃復穀官爵而黨禁遂解明昌二年授并王傅兼知大同府事尋改平陽後爲定海軍節度使時仲洙兄仲淵以罪謫石州仲洙請以萊易石朝廷義而不許致仕卒仲洙果於從政所在有功績號能吏

完顏阿喜宗王子好學問襲北京路善栢山猛安聽訟明決人信而愛之察廉能除彭國軍節度副使又改上京留守判

官提刑司奏彰國治狀同知速頻路節度事仕至河南統軍使卒

烏林答暉明德后兄除蒲州巡碗羣牧使謹畜牧不事遊宴孽

產蕃息進秩改特滿羣牧大定時遷都點檢卒以上大

移刺子敬字同文遼五院人父拔魯天祚西走留督輜重已

而輜重被掠乃自髡逃於山林子敬諳書好學除同知遼州

事舊本廳自有占地歲入數曰貫州官歲取其課地主以爲

例未嘗請辯子敬曰已有公山何爲更取民田竟不取秩滿

郡人請留於行臺省不許大定時爲諫議大夫上幸西京子

敬言山後禁獵地太廣有妨百姓耕墾上用其言遂以四外

獵地與民後自簽書樞密院事出爲河中尹河中地熱土恐

子敬不耐暑改興中尹致仕卒

柴庭明昌七年爲武略將軍充海州司戶飛騎尉有治行禮

雨輒應

以上遼州

段德祥陽曲人以徵辟召見上奇之授定襄簿兼縣尉慈祥

樂易明敏有爲

忻州

烏古倫榮祖本名福興河間人明昌二年進士歷官中都總管府判官察廉除震武軍節度副使遷海州刺史貞祐二年城破力戰死之

張大爵五臺人天眷中以進士任崞縣丞廉謹剛直果於從

政世宗甚愛之累遷戶部侍郎

趙晦爲代州士曹善篆隸詩筆高雅有集傳與宇文虛中有舊時守崞縣聞虛中以使事駕至城遂駕短轅下澤與虛中相聚凡旬日而歸虛中爲賦詩以議一時之事

毛瑞卿彭城進士爲崞縣簿摧圻豪石奸民欵跡排比戶計貧富適當貞祐三年升尙書令

以上代州

孔祖湯泰和三年進士興定中爲寶昌軍節度副使與霍州刺史阿里合同被元獲令之跪不從而死贈資善大夫同知平陽府事

解州

郭通亳州人大定初擢陝西路轉運司都勾判官時晉絳戶稅轉運平涼通監視之官吏無敢有秋毫之犯二州民舉手加額後爲絳陽軍節度副使父老咸曰此昔平涼閔恤我曹者也再期年大治絳人繪像於天甯寺舍立石紀德終清河防禦使

王宗儒大定間爲聞喜縣丞署縣事能決獄弭盜興學愛民王覲遂州人以詞賦擢進士第調聞喜丞廉潔詳辨民皆畏



服

張升大同人爲絳州錄事趙偉反謂所識者誼不能從赴水

死

以上絳州

李曼高平人判隰州軍事政尙平易號爲循良

右金三十三人

胡祇遁字紹開磁州武安人至元元年忤阿合馬出爲太原路治中兼提舉本路鐵冶將以歲賦不辨責之及涖職乃以最聞改河東山西道提刑按察副使

馬英初遁跡石州金末避兵合河元署興州觀察使判官政成訟息惠愛及民祀名宦

李繼本東安人至正間以翰林檢討出爲山西省理問尋授太原府同知以文學政事有聲有文集行於世

顏瑜曲阜人復聖公五十七代孫以行誼舉任陽曲教諭訓

迪士子殷殷不倦被賊執罵不絕口死之祀名宦

以上太原府

王憚字仲謀衛州汲縣人至元九年授承直郎平陽路總管府判官太平縣民陳氏殺其兄行賂緩獄蔓引逮繫者三百餘人至五年不決委憚決之一訊卽得其實乃盡出逮繫者時絳久旱一夕大雨大德八年卒追封太原郡公

楊佑之大德年任翼城縣主簿精敏有幹略勸農興學後鄉

舉賈之美李邦獻等立碑記之

以上平陽府

周泰東平進士潞州同知以文學飾吏治一時制作多出其手

宋思齊屯留人潞州判官才氣英邁儒吏兼通爲政寬仁不

尙刑罰

沙班至正時任黎城主簿公勤有幹稱賢倅焉

以上潞安府

陳資壽錦州永樂人以監軍駐甯鄉勦捕羣寇輯綏人民

高岡字陟夫甯鄉人初爲本縣尉尋遷石州軍判中統元年進同知岡達民情精吏事民德之

陸大用神峯人延祐中同知汾州廉公有威吏民畏服

程邦彥祁邱人善詞章工草隸賦詩撰文稱三絕任汾州同知奉法循理郡人德之有遺愛碑

李朝英孟縣人金進士孝信孫至正間判汾州有政績以上汾州府

周克明字文舉清苑人至元四年主簿陽城縣政尙寬簡禱雨有應民爲立碑祀名宦

李鎔山東人至正間由河東運司遷沁水簿築室城南石樓

山延絳人郭晉以道德文章率諸生一時士習丕變雖兒童

婦女皆趨教化

以上澤州府

劉源字巨川翼城人以儒吏兼通充宣慰佐史奏對稱旨授

勅牒爲西京路經歷至元二十九年遷授將仕郎本縣尹廉

能簡靜有蒲鞭遺風葺學校不勞民力翕然修舉

大同府

許有壬字可用居湯陰延祐二年進士授同知遼州事會關

中有警邠州聽州民出避棄孩嬰滿道有壬獨率弓箭手閉

城門以守卒獲無虞州有追逮不許胥隸足跡至村疇唯給

信牌令執里役者呼之民安而事集右族貪虐者懲之寃獄

雖有成案皆平反而責其罪州遂大治六年己未遷山北廉

訪司經歷

張欽祖至正間知和順縣事鼎新學校譽重當時

梁宇初爲榆社丞歷任趙城汾西太原徐溝擊強治奸廉能

有聲治行爲諸縣最

以上遼州

保保至正元年同知平定州時春三月不雨至夏六月禾稼就稿保保免冠跣足禱于崔府君廟明日雨大降秋七月復不雨禱如初雨復降遂命修其廟翰林學士揭傒斯爲之記崔可儀任壽陽主簿築濟城分工共理以勤慎著

顧思孝延祐間平定州學正作文簡古以儒雅稱於時

拜出至正間同知孟州事時雜役繁重又修管芹泉驛舍出奏於朝罷其役人民賴之祀名宦

劉福平定元帥府監軍祿服其恩信于熙載有學行父子相

繼者凡十餘年

以上平定州

皇甫德崞州人丰采奇偉穆呼哩器之延諮時務拜信威將

軍本州觀察判官行元帥府事扇仁風誦強梗興學校勸農桑民以良牧稱之

州代

王守忠潞州人至大間隰州判官佐政有方

李良中山人由春官出爲蒲縣主簿慈祥明決刑獄不濫洩任半載四境晏如

以上隰州

右元二十八人

山西通志卷一百十二